



Palle Jerimiassen, Inuit Ataqatigiit, Atassut, Naleraq, Demokraatit

Avannaani Kommuniani politik-ikkut anguniagassatut isumaqatigiissutaat

Ulloq 13. maj 2021

## Anguniangassat pingaarnerusut pingasut:

### Aqutsilluarneq – ineriartoqatigiinnerlu

Innuttaasugut misigipput aqutsilluartoqanngittoq ineriartoqatigiinngittugullu.

Aqutsilluarneq borgmesterimit innuttaasunut ataasiakkaanut pitsaasoq ingerlatissuarput. Innuttaasut peqataatinneqartut misigissapput, kommunimik piginneqataasut ineriartortitseqataasutullu misigitinneqarlutik, tamannalu suliarissuarput, inoqarfinnut tamanut ornigunnikkut peqataatitsinikkullu.

Tamat oqartussaaqataaneranni peqataanermik misigititsineq nunaqarfinni aqutsisuni annerusumik piulissooq, oqartussaaftit nunaqarfiit ineriartortinneqarnissaannut annerusumik tulluussakkat aqqutigalugit.

Tunisassiorfeqarnikkut ineriartorfusut aamma meeqqeriveqarnikkut inerisaavigneqassapput.

Qaanaamikkaanni, Kullorsuarmiikkaanni, Ukkusissaniikkaanni Ilulissaniluunniit, inoqarfimmiluunniit allami, ineriartornissamik pisariaqartitsineq naapertorlugu ineriartoqatigiinnermik misigineq piussooq.

Inuk kinaluunniit namminerisamik angerlarsimaffeqarnissamik piginnaatitaaffeqarpoq, tamannalu pimoorunnerulissuarput, pingaartumik inuusuttut meerartallit ilaqutariittut ingerlariaqqinnissamik aqqutissiuunneqassapput – aamma nunaqarfinni ineriartorfusuni.

### Isumassuinermi sullissinermik aaqqissuusseqqinneq

Innuttaasut isumaginninnikkut pitsaanagerusumik aqutsisoqarnissaa piumasaraat, ilaqutareeqarpoq pisariaqartitsilluinnaraluarlutik ullormi pisariaqartitsiviminni tusarnaarneqarsinnaasanninnerminnik maalaaruteqartartunik, tamannalu piviusuummat nassuerutigisariaqarparput.

Piffissap ingerlanerani suliniutit assigiinngittut immikkuualuttut aallartisarneqartarnikuupput, nukit pitsaasumik siunertallit, taamaattoq ima siammasitsigilersimapput ilaatigut imminnut ataqatigiinngittut nalilerneqartariaqarlutik.

Meeqqap kissaatiginerpaasarpaa anaanaq ataatalu najornissaa, taamaattumik angerlarsimaffiup avataanut inissiiinginnermi suliniutit angajoqqaanik peqataatitsinermik tunngavillit aallunneqassapput. Ilaqutariinnik ataatsimut sullissineq pikkorissarnernik pisariaqartunik toqqammavilik, meeqqat inuusuttullu angerlarsimaffimminnut angerlariartortinneqarnissaannik siunertalik.

Immikkut pingaartillugu taasariaqarpoq, meeqqat immikkut pisariaqartitsisut siusittukut iliuuseqarfigineqartarnerat annertusisamik periuseqarfigissallutigu.

Kultuuri timersornerlu pitsaaliuinerupput annertuumik, taamaattumik malunnaatilimmik inerisaavigneqassapput, ilaatigut kulturikkut timersornermillu siunnersortimik atorfinitsitsinikkut.

Innuttaasut isumassuinermi – **pingaartumik meeqqat inuusuttullu** - sullinneqarnerat ataatsimut isigalugu nukit pitsaanagerusumik siammasinnerusumillu atornissaat anguniarlugu isumassuinermi sullissinitta nutaamik aaqqissuuteqqinneqarnissaa sulissutigissuarput – sullissineq meeqqap angajoqqaavisalu alloriaqatigiiffigisinnaasaanik tunngavilik.

## Avatangiisigut – eqqaaveqarnerlu

Innuttaasut, pingaartumik isorliunerusuni avatangiiserput aallunnerusariaqaripput oqariartortuarput, eqqaaveqarneq anartarfeqarneq sumilu tamani saligaatsuutitsineq eqqarsaatigalulu – aamma aalisarfinni.

Avatangiisitsinnik saligaatsuutitsillutalu eriaginninnerput timitalersussuarput tamatta ataasiakkaatut akisussaaqataanitsigut, suliffeqarfinni namminerlu angerlarsimaffitta eqqaanni.

Nunaqarfinni eqqaavissuarnik anartarfeqarnermilu ingerlatsinerit akuersaaginnarunnaarpagut, takussutissalimmik iluarsartuussinerit qiningaaffik naatinnagu malunnaatilimmik inerisaavigineqarsimassapput kiisalu sulisunut atugassarisaasut pitsanngorsaavigineqarlutik.

Kuuffissuaqarnikkut pilersaarusiortoqassooq qiningaaffiit tulluuttut ilanngullugit ilusilikkamik, taamatullu anartarfiit avatangiisinut minguitut periarfissaanerat issittumi ilisimasaqartut peqatigalugit tulluuttumik nassaarnissaq inerisarneqassooq.

Avannaata Kommuunia tassaassooq inuttut aningaasarsiornikkullu ineriartorfiusoq – innuttaasut peqatigalusi suliaq.

*Anguniangassat pingaarnerusut saniatigut susassaqarfinni ataasiakkaani suliniutigineqarumaartut pingaarnersiukkat ataani taakkartorneqarput. Anguniakkanik aningaasalersuineq missingersuusiornerni tulleriissaarinikkut ukiukkaarumik aningaasartalersuisoqassooq, anguniakkallu ilaat siunissami qiningaaffiit akimorlugit pilersaarusifigineqartariaqarumaarnerat qularnanngilaq.*

*Isumaqatigiissullu missingersuusiornermut atasumik ukiukkaartumik nalilersorneqaqqittarumaarpoq.*

**Borgmester, Palle Jerimiassen**

- 1. viceborgmester, Jens Ole Nathanielsen**
- 2. viceborgmester, Anthon Frederiksen**

**Ataatsimiititaliat pilersitassat:**

- Aningaasaqarnermut ataatsimiititaliaq**
- Teknik-imut ataatsimiititaliaq, Naleraq, Anthon Frederiksen**
- Ilaqutareeqarnermut ataatsimiititaliaq, Inuit Ataqatigiit, Bendt B. Kristiansen**
- Piorsarsimassutsimut atuartitaanermut sunngiffimmullu ataatsimiititaliaq, Demokraatit, Lena R. Davidsen**
- Inuussutissarsiornermut ataatsimiititaliaq, Inuit Ataqatigiit, Niels Davidsen**
- Aalisarnermut piniarnermullu ataatsimiititaliaq, Naleraq, Aqqaluk Heilmann**
- Tamat oqartussaaqataanerannut nunaqarfinnullu ineriartortitsinermullu ataatsimiititaliaq, Atassut, Knud Kleemann**

## Aqutsilluarneq

1. Kommuniq aqunneqarnerani aqutsilluarneq qitiussaaq, innuttaasut akileraarutaat pitsaanusumik aqunneqassapput. Politikkikkut anguniakkat pitsaanusumik inerititaqarfiussappata Avannaata kommuniani sulisunut pisortallu aqutsinermik pikkorissartinneqartarneri pisariaqarpoq.
2. Tamat oqartussaaqataanerat peqataatitsinermik tunngaveqassaaq, innuttaasut isummersoqataaginnaratik ilusilersueqataatinneqassapput. Sumiiffimmi ataatsimiititaliat ilusilersugaanerata isorliunerusuni nutarterneqassaaq, sinniiseqassuseq tamat toqqissisimaffiginerusinnaasaat toqqammavigalugu.
3. Tusarniaanernik ingerlanneqartartutigit innuttaasut tusaaneqanngitsut oqartussaaqataatinneqanngitsutullu misigitinneqartarnerat ilorraap tungaanut saatissavagut, ilaatigit ataatsimiititaliat susassaqarfimmini pisariaqartoq naapertorlugu siunnersuisooqatigiinnik pilersitsisarnikkut.
4. Atorfinititsisarnerit peqqissaartumik eqqortumillu ingerlanneqartassapput.
5. Qinikkat, ataatsimiititaliani siulittaasut ilaasortallu ataqatigiissaarluakkamik ukiut tamaasa sumiiffinnut ornigullutik tusarniaasassapput, sumiiffimmi inerisagassat qulakkeerniarlugit.

## Aaqqissuussaaneq

6. Kommuniq allaffissornikkut aaqqissuussaaneq arlaannaannulluunniit attuumassuteqanngitsumik peqateqarluni nalilersuiffigineqassaaq. Aaqqissuussaaneq atugarput kommunitinni sutigit nukittoqteqarnerisooq sanngiiffeqarnerisooq qulaajarneqassalluni. Anguniassavarput kommunita aaqqissuussaaneq innuttaasunut qanilaarnerpaamik ammanerpaamillu ingerlatsinissaa aammalu misilittangaareersut pittaasut atorluarnerisigut.

## Ineqarneq pitsaasoq – tamatta pisinnaatitaaffipput

7. Ilaqutariittut ajornartorsiutit inissaaleqinerlu ataqatigiikkajuttarput. Inoqarfiit ineriartortut inissaqarniarnikkut inerisaavigineqassapput, inuusuttunut inissialiorneq pingaartut anguniarneqassaaq, pingaartumik inuusuttut meerartallit annerusumik periarfissaqartinneqassapput. Suliffeqarfiit ineriartornermut annertuumik peqataasut inissialiornikkut akisussaaqataanerussapput.

## Inunnik sullissineq ataqatigiissaagaq

8. Kommunierput isorartuujuvoq, tamannalu sulinermik aqutsinermillu ataqatigiissaarinermik annertuumik pisussaaffiliivoq. Inunnik sullissineq eqaatsoq piimavarput, kommunimilu innuttaasunut sullissatsinnut sulisoqarnikkut naapertuuttumik qinersinerup kingorna

suliaqarnissarput suliarissavarput. Kommunitsinnut inunnik sullissiniarlutik sulisut atugaasa pitsaasuunissaat pisussaaffigaarput, sulisullu paariinnarnissaannut suliniarnissaq suliarissavarput.

9. Inuit pisinnaatitaaffiinnut naapertuuttunik suliaqarnissaq pillugu suliniutinik aallarnisaanissaq pilersaarusiornissarlu inuit pisinnaatitaaffiinnik suliaqartut peqatigalugit suliarissavarput. Avannaani inuit pisinnaatitaaffitik naapertorlugit inuunissaat siunnerfigaarput. Innarluutilinnut, meeqqanut, inunnut ikorfartugassanut ikorfartornissaannut kulturikkullu inuusaatsinut pisinnaatitaaffinnut tunngassuteqartunut suliat nukittorsaaffigissavagut.

## Nunaqarfinni isumassuineq

10. Nunaqarfinni isorliunerusunilu inunnik isumassuineq qaffassarneqassaaq. Utoqqaat nammineersinnaasut sapinngisamik angerlarsimaffimminniiginnartinnissaat tunngaviusaaq, tamanna qulakkeerniarneqassaaq ikiortitigut tapersersorteqartitsinikkut.
11. Inulerisunut pikkorissartitsinerit ataavartut ingerlanneqartassapput.

## Atuartitaaneq

12. 7.-10. Klasse-mi assessorissanut piginnaasallit piginnaasaminnik annertusaanissaminnut aqcutissiuunneqassapput atuangarsorneq assassornermik ikorfartorneqartumik.
13. Alimasissumik ilinniartitaaneq qiningaaffiup ingerlanerani malunnaatilimmik ineriartortinneqassooq ilinniartitsisut piginnaangorsarnerisigut peqataatinnerisigullu.
14. 1. Klasse-miit 7. klasse-mut sulisoqarnikkut aqutsilluarnikkut angusat qaffasissumik pittaassusilerneqarnissaat anguniarneqassooq.

## Nunaqarfinni kommunimi sulisut pikkorissartarnissaat

15. Kommunimi sulisuusut pigiinnarnissaat innuttaasullu sullinneqarnerisa minnerpaaffeqartumik pitsaassuseqartuarnissaat anguniarlugu sulisunik pikkorissartitsinerit ataavartut ingerlanneqartassapput.

## Nunaqarfinni aqutsisut annertunerusumik oqartussaaqataanerit sulisutigissavarput

16. Nunaqarfinni aqutsisut annerusumik oqartussaaqataarusunnerat qanimut peqatigalugit ilusilersoqqissavarput. Nunaqarfinni aqutsisut kommunalbestyrelsimit qanimut suleqatigineqarlutik oqartussaaqataanermi ersiutilimmik peqataatinneqassapput.

## Piniarnermut kulturerput, piniariaaserput, pisanik agguariaaserput eriagitigu

17. Piniartuuneq nunguinnassangippat sutigut tamatigut eriaginiagassaraarput.

18. Piniarnermut kulturerput, piniariaaserput, pisanik agguariaaserput Avanersuarmi ingerlanneqartoq eriagissavarput tammatsaaliorlugulu.
19. Piniarnermi ileqqut ileqqoreqqusaliornikkut sumiiffikkaartumik tulluussakkanik suliaqarfingineqassapput piniartut peqatigalugit.
20. Avanersuarmi naaleqqaarlugu qilalukkanik piniariaaseqarnerup nunarsuarmioqatigiit eriagisassatut allattorsimaffiannut ilanngunneqarnissaa anguniarneqassaaq.

## Meeqqat angerlarsimaffiup avataanut inissinneqarsimasut angerlartiortor-nissaat

21. Isumaginninnikkut sullissisut illoqarfinni avannarpasinnerusumiittut nunaqarfinnilumi pikkorissartarneqarnissaat pilersarusiorneqassaaq ukiut tamaasa ingerlaavartussamik.
22. Pinaveersaartitsineramik suliallit avannarpasinnerusuni aallunneqarnerulissapput, pikkorissartarnikkut suleriaatsillu inerisaqqinnerisigut.
23. Meeqqat inuusuttuaqqallu angerlarsimaffiup avataanut inissinneqarsimasut angerlartinnissaannut suliniutit aallartisarneqassapput, angajoqqaanik pikkorissaanerit ilaqutariillu ataatsimut sullinneqarneri aqutigalugit.
24. Angajoqqaat meeqqanik angerlarsimaffiup avataanut inissinneqarsimasunik qitornallit misigitinneqassapput pimoorunneqarlutik.
25. Angerlarsimaffiup avataanut inissinneqarsimasut minnerpaaffiminniittariaqalerput.
26. Meeqqanik angajoqqaasiaasartut sullinneqarnerat pittanngorsaavigineqassooq, ilaatigut pikkorissartitsisarnikkut ineriartoqataatinneqarlutik.

## Piorsarsimassuseq

27. Sunngiffimmi sammisassaqtitsinerup ullutsinnut tulluussakkamik eqaannerusumillu inerisarneqarnissaa suliarineqassooq
28. Naalagaaffiit Peqatigiit meeqqat pillugit isumaqatigiissutaat malillugu ingerlatsissaagut, paragraf 31-mi Nunatta atsioqataaffiginikuusaani allaqqavoq: Meeraq kulturikkut kiffaanngissuseqarluni peqataasinnaatitaasoq kulturikkut eqqumiitsuliornikkullu. Taamaattumik kulturikkut meeqqanut sammisassaqtitsinerit annertusarneqassapput, kulturi ingerlaartup kommunimi tamarmi pilersinneratigut.
29. Meeqqanut nipilersornermik ilinniarfiit pilersinneqarsinnaanissaat sinaakkusersorneqassapput. Peqatigiiffiit Avannaata Kommuniani pioreersut kulturilerinernut attuumassuteqartunik suliallit innuttaasunut iluaqutaasunik anguniagaqartut eqaannerusumik Avannaata Kommunianut qinnuteqarsinnaalernissaat aqutissiuusseqataaffigissavarput.

## Sanaartorneq inuit ineriartortinneqarnerannik siunertalik

30. Kommunitsinni sanaartornermi pilersaarutit innuttaasut ineriartornissaannut siunertalimmik pilersaarusiorneqassapput. Sanaartugassanik pilersaarusiortarneq pillugu innuttaasunut tamanut paasisitsiniutigineqartarnissaa pingaaruteqarpoq, taamaasilluni pingaarnersiuiunerit innuttaasunit nalornissutaanatik ingerlassammata. Sanaartugassanik pingaarnersiuisoqar-tillugu nunaqarfinni aqutsisut peqatiserineqartassapput pingaarnersiueqataatillugillu.

## Suliffissaqartitsineq / Majoriaq – pisortanit ikiorsissutit – siusinaartumik soraarnerussutisiaqarneq

31. Ullumikkut Avannaata Kommuniata sulisinnaasunik sulisunngortitsiniaanernik ingerlatsinera inerisarneqassaaq.
32. Sulisinnaassutsip qaffassarnissaanut periarfissarsiuussineq ingerlanneqassooq
33. Suliffissarsiuussisarfik sulisutigut nalimmassaavigisassaavoq, sullitallu ineriartornissamut periarfissiuunneqarnissamut aqutissaannik pilersitsinissaq avaqunneqarsinnaanani.
34. Majoriami sulisinnaangorsaaneq - minnerunngitsumik (Vejledning & Motivations forløb)- aqqutissiuussineq kaammattuinermilu ingerlatsinermi aammalu (flexjob) – eqaannerusumik sulisitsineq ingerlanneqarnissaannut nukinnik annertusaassaagut.
35. Sulilersitsiniaaneq angusaqarfiunerussappat sulisoqarnikkut tulluussaasoqassaaq atorfiilluunniit amerlineqassallutik.
36. Inunnik isumaginnittoqarfimmi sullinneqartartut matchgruppe 3-miittut suliffissarsiortut piginnaangorsarfissaannik pilersaarusiussaagut.

## Sumiiffimmi ataatsimiitaliat allatut

37. Sumiiffimmi ataatsimiitaliat ilaat ingerlalluarput, ilaanni ingerlanerlunnerusoqarluni. Sumiiffimmi ataatsimiitaliat kommunalbestyrelsimut qaninnerusumik suleriaaseqassapput, oqartussaaqataaneq ersarinnerusoq piginnaatitaaffigissavaat.
38. Immikkut Qaanaami sumiiffimmi ataatsimiitaliaq qanimut suleqatigineqassaaq, kulturikkut avinngarusimasumik inissisimanerat immikkuullarissumik isiginiarlugu.

## Utoqqaat atungarisaat

39. Utoqqaat inuuneqqortusiartorput sivisunerusumillu nammineersinnaassuseqaleriartorlutik. Utoqqarnut tulluartunik inissianik inerisaasoqassaaq.
40. Utoqqaat qaammammut akilingassat tamaasa akilereerlugit inuup tapiatigut inuussutigisinnaasaasa minnerpaaffiata nutaamik aqqiivigineqarnissaa suliarineqassooq

## Timersornikkut atugassarititaasut kulturikkullu ingerlatsineq

41. Kommunitsinni timersornikkut avatangiiserisagut illorsuit timersortarfiit, nunaqarfinni katersortarfiit aserfallassimaqisut atuisut pisariaqartitaat naapertorlugu pilersaaruserlugillu nutaaliordfigineqassapput.
42. Ulluinnarni peqqinnerulernissamik anguniagaqarpugut aammalu timersoqatigiiffiit ikorfartorneqarnissaannik pisariaqartitsisarneq piusartoq oqilisaaviginiarlugu timersornikkut kulturikkullu siunnersortimik pilersitsissaagut.
43. Atorfik fundraiser pilersinneqassooq, siunertat Multiarena aamma naluttarfissaq siunertallu allat assingusut aningaasalerneqarnissaanut aningaasassarsiortartussamik.
44. E-sport-imik unammisartut avatangiisaasa inerisaavigineqarnissaat sulissutigineqassooq.

## Aalisartutut piniartutullu avatangiisit

45. Aalisartut atortuminnik aserfallattaaliiffigisinnaasaannik periarfissat inerisarneqassapput - ilaatigut qamusiorfiit, umiatsialeriviit neqitsersuiviusinnaasullu inerisaanikkut.
46. Aalisarnermut inatsisissap suliarineqarnerani Avannaata Kommunia aalisartut peqatigiiffii qanimut peqatigalugit isummersoqataassooq.
47. Aalisarnermi piniarnermilu atukkat sumiiffikkaartumik pisariaqaritsineq naapertorlugu ileqqoreqqusarliornikkut tulluussaavigineqassapput.
48. Qaleralinniarnermi ileqqoreqqusat nalilersoqqinneqassapput, pingaartumik Diskobugt-imi ileqqoreqqusaq, Uummannallu sulluani ileqqoreqqusaq inaarsarneqarluni.
49. Aalisarnermi siunnersuisooqatigiit pilersinneqassapput.
50. Aalisarfinni saliisitsisarnermut aningaasaliisarneq ingerlaannassooq

## Inuussutissarsiorneq

51. Inuussutissarsiornikkut siuarsaaneq annertusarniarlugu illoqarfinni sisamani namminersortunik inerisaasussanik qiningaaffiup ingerlanerani pilersitsinissaq inguniarneqassooq.
52. Suliffeqarfinnik aallartitserusuttut pitsaanagerusumik periarfissiuunneqassapput.
53. Nunarsuarmi niuffaffiit nutaat nunatsinnut appakaakkaluttualersut inuussutissarsiuteqartut peqatigalugit periusissiorfigineqassapput.
54. Sumiiffinni tamani mittarfittaarnissamut piareersarneq sukumiisumik ingerlanneqassooq, inuussutissarsiortut qanimut suleqatigineqarlutik.

## Isorliunerusunut ineriartortitsinissamut periusissiaq

55. Qiningaaffiup ingerlanerani ukiuni qulikkaanut tulluuttuni isorliunerusunut ineriartortitsinermi periusissiortoqassooq.
56. Nukissiuutit ataavartunik atuinerunissamik periusissiortoqassooq.

## Teknikkeqarfik aamma avatangiitsit

57. Avannaata kommuniua aqqusineqarnikkut annertuumik kinguussaaqqavoq. Asfaltimik suliaqartarneq pilersaaruserluakkamik ingerlanneqartariaqarpoq, aqqusinermilu suliaqartartut inerititaqarnerusut takussaalissapput. Illoqarfinni aqqusinertigut angallanneq pilersaaruserneqassaaq inuit isumannaatsumik toqqissisimasumillu inissaqaqqullugit.
58. Teknikkimut susassaqarfik saaffikkuminartuusooq, innuttaasut teknikkeqarfik pillugu naammaginninningsuunerat asuliinnaanngitsoq iluarsivigineqassaaq.
59. Silami qaammaqqusersuineq utoqqaat pisinnaanerusullu angerlarsimaffiisa tungaanni atuisunut tulluarsagaanersumik iluarsaanneqassaaq.
60. Nunaminertanik torersuutitsineq sumiiffinni tamani pimoorunneqassaaq, atuisullu akisussaaqataanerit ersarissumik takussutissaqatinneqassaaq.
61. Illoqarfinni nunaqarfinnilu umiatsiaararpassuaqaleqqavoq, umiatsialeriffiusinnaasulli amigaatigilluinnarlutigit. Umiatsianik qaqqitsissutit kranit nutarsarlugit kiisalu umiatsianik iluarsaassiviusinnaasut nutarsarlugit/pilersinnissaat. Piffinni aalisarfiusuni/piniarfiusuni illuaqqat amerlanerit pisariaqartinneqarput, pioreersut aserfallatsaaliorneqartariaqaleqqallutik.
62. Nunaqarfinni kranit nutarsarlugit imaluunniit nutaanik taarserlugit.
63. Illoqarfinni tamani umiarsualiveqarnermut siunnersuisooqatigiinnik pilersitsisoqassaaq atuisut oqartussaaqataannissaat pingaartillugu.
64. Illoqarfiit bus-inik aqqissuussivigineqarnerat inerisarneqaaqqisooq, ilaatigut Upernavik Qaanaarlu isiginiarneqassallutik.

## Qatserutaasiviit

65. Qatserutaasiviit qatserisartullu atugarisaat kinguussaalluinnaaqqapput. Qatserisartut aqutsisutut pikkorissartinneqartarnissaat pilersaaruserluagaasariaqarpoq.

## Peqqinnissaq

66. Inuttut peqqissuunissarput annerusumik sulissutigissavarput peqatigiiffinnut, timersoqatigiiffinnut inunnullu ataasiakkaanut aalanerulernissaq siunertaralugu timersornermut, peqatigiiffilerinermut siunnersortimik pilersitsinikkut, pingaartinneralunissaaq inuit timersornermik aallutaqanngittut.

## Takornariaqarnikkut ineriartortitsineq

67. Ukiut aggersut takornariaqarnikkut annertuumik pisoqarfiussasut qularnanngilaq. Nunaqavissut takornarissanik sullissinermik annerusumik peqataatinneqarnissaat aqutissiuunneqassaaq, pikkorissaanerit periarfissanillu ilusilersuinerit aqutugalugit, tamanna suliffeqarfiit peqatigilluinnarlugit aqqissuunneqassaaq.

## Avannaani assigiinngisitaarneq nukittuffigaarput

68. Avannaata kommuniani assigiinngisitaartumik inuuneqarnerput nukittut isigissavarput. Assigiinngisitaarnerput pillugu aqutsinikkut ataqatigiissaarilluarnissaq Inuit Ataqtigiit suliarissavaat. Innuttaasut aalisartut piniartut, sulisartut, namminersortut, meeqqat, inersimasut, utoqqaat, illoqarfimmiut nunaqarfimmiullu innuttaraagut aallaaviusussat. Assigiinngisitaarnerput annertuumik piorsarsimassutsitigut tunniussassaarpoq.

## Meeqqeriveqarnikkut nutarterineq

69. Inoqarfiit ineriartortut meeqqeriveqarnikkut inerisaavigineqassapput, nunaqarfiit tunisassiorfeqarnikkut meerartaqarnikkullu ineriartorfiusut sallertut pingaartillugit, ilaatigullu dagpleje aqutigalugu paaqqinninnermi eqaallisaasoqassooq. Meeqqeriviliortitererit pisariaqartitsinnermut naapertuuttumik pilersaarusionerqassapput.

## Kommunerput tikillugu minguitsuussaaq

70. Kommunitsinni ukiuni qulikkaani tulliuttuni avatangiisitsinnik atuinerput malunnaatilimmik siuarsaavigissavarput. Eqqakkat katersorneqartarnerat illoqarfinni nunaqarfinnilu siuarsaaffigiumallugit annertusisamik iliuseqassaagut. Eqqakkat pillugit iliuseqarnerunissarput takornariaqarnikkut tikikkuminartuunissamut tunngaannangilaq, avatangiisittali eriaginissaanutaaq tunngalluinnarpoq. Tikikkuminartuunissamut suliniuteqarneq nunaqarfimmi aqutsisugut qanimut peqatigalugit suliarineqassaaq.

## Allaffeqarfinnik inerisaaneq

71. Illoqarfinni allaffissuit ullumikkumut naleqqutinngillat, illutaasa ilaat nutarsarnejassapput nutaamilluunniit allaffeqarfiliortoqarluni.
72. Nunaqarfinni kommunip allaffii sullissinnermut tulluarsarnejassapput, pisariaqarfiini nutaanik allaffiornikkut
73. Kommunip allaffiini annittakkanik anartarfeqarfiusuni inerisaasoqassaaq ullutsinnut naapertuuttumik, ilaatigut kuuffissuarnik pilersaarusionerikkut anartarfiilluunniit nutaaliaasut mingutsitsisuunngitsullu atonerisigut.